

### Expression : e besonh !

- *Vam mair, e pòdes tostemps pujar los escalèrs ?*
- *Oc e besonh !*

Un aute exemple :

- *E l'esquia que va mièlher ?*
- *Oc e besonh !*

«E besonh » qu'ahorteish l'affirmacion en har compréner a l'interlocutor de qu'ei ua necessitat. *Qu'ei ua familia qui se'n veden entà juntar. Lo pair qu'a perdut lo son tribalh e qu'a calut har dossièrs entà tocar allocacions qui tardan...*

- *Vam, per la fin, avetz tocat lo caumatge ?*
- *Oc e besonh !*

Ací lo « e » non sembla pas estar un enonciatiu. Lhèu aqueth « e besonh » ei ua simplificacion de l'expression « que hè de besonh » ?Çò de segur qu'ei un sinonime popular de « urosament ».

### Numeraus còps qui a imprecis : dus, duas...quate

- *E lo casau quin l'as ?*
- *N'i tribalhi pas guaire mei mes que volerí totun har duas tomatas e dus pipèrts !*

Ací lo « dus, duas » que vòu díser « quauques, quauquas ». Que pòt estar dus segur mes lo mei sovent que serà drin mei : quate o cinc.

Tà díser precisament « dus », « duas » que's pòt emplegar « un par »

*As vist aqueth par de gojatas si son beròias !*

Lo mei sovent « quate » que serà mei e còps qu'i a hèra mei que « dus »:

*Augan qu'avem avut hèra de pomas. Que ve'n vau balhar quate.*

Que pòt estar un detzenat... o dus quilòs parièr !

Que sia entà « dus » o entà « quate » qu'ei ua faïçon tau qui balha de prepausar chic e de'n auherir mei ... çò qui dobla lo plaser tau qui receu !

Entà clavar, disem que los numeraus que son emplegats entà marcar un nombre precís. Totun, entà « dus » e « quate », segon lo contèxte, que pòden estar un nombre mei gran.

### Pronoms personaus : desbrombà's...

Tres exemples basics... e aisits :

*Que s'a desbrombat lo paraploja*

*Que m'èi desbrombat lo còde de la pòrta d'entrada*

*Que v'avetz desbrombat de'm balhar la clau*

Mes a còps qu'avem construccions mei complicadas :

*Que se m'èi desbrombat de t'ac díser*

*Non t'ac desbrombaràs pas !*

Dens la construccion pronominau, lo pronom personau conjunt que marca l'investment deu subjècte dens l'accion.

### Medecina populara : lo batedit (*panarís*).

*Que cau har borir aiga dab drin de sau e trempar lo dit nau còps. Quan ei madur que'u crèban dab ua agulha (dit – e òc !- peu pair).*

Que vederam que pro sovent, en lo rituai de las recèptas popularas, qu'avem la chifra nau qui trobam tanben en las cantas tradicionaus qui aperam cantas de nau.